

BOSNA I HERCEGOVINA
FEDERACIJA BiH
ZENIČKO-DOBOJSKI KANTON
GRAD ZENICA

N A C R T

OBRAĐIVAČI

- Služba za ekologiju, komunalne i inspeksijske poslove
- Služba za urbanizam, imovinsko-pravne, geodetske poslove i katastar nekretnina
- Javno preduzeće za prostorno planiranje i uređenje grada "Zenica" d.o.o. Zenica

O D L U K A O NERAZVRSTANIM CESTAMA GRADA ZENICA

Zenica, mart 2018. godine

Na osnovu člana 13. stav (2) Zakona o principima lokalne samouprave u Federaciji BiH ("Službene novine Federacije Bosne i Hercegovine" broj: 49/06 i 51/09), člana 4. stav (2) Zakona o cestama Federacije Bosne i Hercegovine ("Službene novine Federacije BiH", broj: 12/10,16/10 i 66/13) i člana 21. Statuta Grada Zenica ("Službene novine Grada Zenica" broj: 5/15), Gradsko vijeće Zenica na _____sjednici održanoj _____, donijelo je

ODLUKU O NERAZVRSTANIM CESTAMA GRADA ZENICA

I - OSNOVNE ODREDBE

Član 1.

Ovom odlukom uređuje se upravljanje, izgradnja i rekonstrukcija, zaštita, korištenje i održavanje nerazvrstanih cesta kao i poslovi nadzora nad tim cestama na teritoriji grada Zenica.

Član 2.

Nerazvrstana cesta je površina koja se koristi za saobraćaj po bilo kojoj osnovi i koja je pristupačna većem broju korisnika, a nije svrstana u kategoriju javnih cesta (u daljem tekstu: cesta).

Član 3.

Nerazvrstane ceste kao dobra u općoj upotrebi su u državnoj svojini, na njima se ne mogu sticati prava po bilo kojoj osnovi osim prava određenih ovom odlukom.

Član 4.

Nerazvrstane ceste, zajedno sa javnim cestama (lokalne ceste i gradske ulice) čine mrežu cesta na području grada Zenica i biće upisane u katastarski operat.

II - UPRAVLJANJE NERAZVRSTANIM CESTAMA

Član 5.

Poslove upravljanja, izgradnje i rekonstrukcije, zaštite, korištenja i održavanja cesta kao i poslove nadzora na cestama obavlja nadležna služba za komunalne poslove (u daljem tekstu: Upravitelj).

Član 6.

(1) Upravljanje cestama u smislu ove odluke obuhvata:

- a) korištenje, organizovanje i obezbjeđivanje minimalnih uslova za nesmetano odvijanje saobraćaja;
- b) vršenje javnih ovlaštenja (odobrenje za: vanredni prijevoz, prekomjernu upotrebu cesta, izgradnju objekata i instalacija, priključaka odnosno prilaza, izgradnju autobuskih stajališta, poprečno postavljanje instalacija, odobrenje za postavljanje reklama, nalog za obustavu bespravnih radnji i otklanjanja smetnji na cesti i u zaštitnom pojasu);
- c) vršenje poslova zaštite cesta, odnosno zabrana ili ograničenja intervencija na cesti i slično;
- d) organizovanje stručnog nadzora nad održavanjem i zaštitom cesta;

- e) vođenje evidencije (baze podataka) cesta, a na osnovu podataka dobijenih od nadležne uprave za imovinsko-pravne poslove i katastar nekretnina.
- (2) Upravljanje cestama u smislu ove odluke jeste i planiranje razvoja mreže cesta i utvrđivanje trase puta.

III - IZGRADNJA I REKONSTRUKCIJA NERAZVRSTANIH CESTA

Član 7.

- (1) Pod izgradnjom cesta, u smislu ove odluke, smatra se izgradnja cesta pretežno po novoj trasi uz prethodno pribavljeno odobrenje nadležne službe za urbanizam.
- (2) Osnovni konstruktivni elementi ceste moraju se dimenzionirati i graditi tako da zadovoljavaju minimalnu širinu kolovoza od 4,5 metra za dvosmjerni i 3,0 metra za jednosmjerni saobraćaj sa uređenim prosirenjima za mimoilaznje i sa konstruktivnim elementima koji podnose osovinsko opterećenje do 6 tona.
- (3) Širina zaštitnog pojasa ceste u kome se ne mogu graditi stambene i druge zgrade, kopati bunari, septičke jame, otvarati deponije i drugo, podizati zasade koji smetaju prohodnosti i preglednosti puta iznosi tri metra.
- (4) Iznad cijele širine kolovoza ceste mora biti slobodan prostor od najmanje 7 m.
- (5) Plan izgradnje cesta donosi Gradsko vijeće na prijedlog Gradonačelnika.

Član 8.

- (1) Pod rekonstrukcijom ceste smatraju se radovi na dijelu postojeće ceste kojim se bitno mijenjaju njene tehničko-građevinske karakteristike i osnovni konstruktivni elementi u cilju povećanja kapaciteta ceste i poboljšanja uslova prometnih usluga.
- (2) Pod sanacijom ceste smatraju se radovi na dijelu postojeće ceste kojima se poboljšavaju postojeći osnovni elementi ceste i opća sigurnost učesnika u saobraćaju.

Član 9.

- (1) U slučaju izgradnje i rekonstrukcije ceste, odnosno kod vršenja radova koji iziskuju premještanje postojećih instalacija u cestovnom pojasu, vlasnici tih instalacija su dužni o svom trošku izmjestiti te instalacije odnosno prilagoditi ih nastalim promjenama.
- (2) Investitor radova iz stava 1. dužan je najmanje tri mjeseca ranije obavijestiti vlasnika instalacija o početku radova i omogućiti mu uvid u raspoloživu dokumentaciju, ali nije obavezan pribavljati saglasnost vlasnika postojećih instalacija.
- (3) U slučaju da vlasnik instalacija, ne izvrši obavezu iz prethodnog stava, investitor radova na izgradnji i rekonstrukciji ceste izvršit će premještanje postojećih instalacija na teret vlasnika instalacija.

Član 10.

- (1) Pod priključkom na cestu u smislu ove odluke smatra se spoj ceste i druge uređene površine sa koje se vozila i drugi učesnici u saobraćaju direktno uključuju u saobraćaj ili isključuju iz saobraćaja.
- (2) Priključak na cestu se može izvesti samo na osnovu odobrenja izdatog od strane Upravitelja.
- (3) Troškove izgradnje priključka na cestu u skladu sa projektom saobraćajnog priključka i izdatim odobrenjem snosi investitor priključka.
- (4) Priključak na nerazvrstanu cestu sa asfaltiranim kolovozom, mora se asfaltirati u dužini od najmanje 5 metara, računajući od mjesta priključenja na nerazvrstanu cestu.

IV - ODRŽAVANJE NERAZVRSTANIH CESTA

Član 11.

- (1) Održavanje ceste podrazumijeva izvođenje radova kojima se obezbjeđuje minimum nesmetanog i bezbjednog saobraćaja i čuva upotrebna vrijednost nerazvrstanih cesta.
- (2) Radovi na održavanju ceste mogu biti redovni i vanredni.
- (3) Redovno održavanje obuhvata:
 - a) popravak kolovoza, trupa ceste, potpornih i obložnih zidova i objekata na cesti,
 - b) saniranje udarnih rupa na kolovozu,
 - c) čišćenje kolovoza, zaštita kosina nasipa usjeka i zasjeka,
 - d) zamjenu i popravak prometne signalizacije i ostale opreme na cesti,
 - e) održavanje potrebne preglednosti ceste i znakova u cestovnom pojasu,
 - f) košenje trave i održavanje zelenih površina u cestovnom pojasu,
 - g) održavanje bankina,
 - h) čišćenje snijega s kolovoza i autobusnih stajališta,
 - i) posipanje kolovoza u slučaju poledice i
 - j) obavljanje drugih poslova kojima se osigurava stalan i siguran saobraćaj na cestama.
- (4) Vanredno održavanje nerazvrstanih cesta su obimniji radovi i mogu se izvoditi samo na osnovu tehničke dokumentacije, bez pribavljanja saglasnosti i druge dokumentacije prema Zakonu o prostornom uređenju.
- (5) Vanredno održavanje nerazvrstanih cesta obuhvata:
 - a) obnavljanje, ojačavanje ili zamjenu kolovoznog zastora i potpornih zidova,
 - b) ojačavanje propusta i mostova, zamjenu propusta i zaštita čelične konstrukcije,
 - c) izradu pješačkih staza i ugrađivanje ivičnjaka,
 - d) obavljanje i drugih obimnijih poslova koji ne spadaju u redovno održavanje.
- (6) Hitno održavanje cesta uslovljeno je elementarnim nepogodama i vanrednim okolnostima, a obuhvata aktivnosti koje je neophodno sprovesti kako bi se otklonili nedostaci i time obezbjedilo nesmetano odvijanje saobraćaja, ili odvijanje saobraćaja u otežanim uslovima, kada je onemogućena prohodnost i ugrožena bezbjednost učesnika u saobraćaju.

V - ZAŠTITA I KORIŠTENJE NERAZVRSTANIH CESTA

Član 12.

Pod zaštitom ceste u smislu ove odluke podrazumijeva se:

- a) zaštita cesta od prekomjernog opterećenja, od prekoračenja ukupne mase i osovinskog opterećenja;
- b) zaštita od gradnje objekata u cestovnom pojasu i sprječavanje vršenja radnji na cesti i u cestovnom pojasu kojima bi se mogla oštetiti cesta odnosno ugroziti saobraćaj ili povećati troškovi održavanja ceste;
- c) regulisanje gradnje prilaznih cesta, autobuskih stajališta, parkinga, benzinskih pumpi i sl.;
- d) osiguranje preglednosti na raskrsnicama i krivinama;
- e) regulisanje odnosa sa vlasnicima, odnosno korisnicima zemljišta uz cestu;
- f) sprečavanje deponovanja materijala na cestu ili uz cestu;
- g) regulisanje postavljanja kablova, vodova i instalacija u trupu ceste i u cestovnom pojasu;
- h) regulisanje odvodnje, prokopavanja cestovnih i odvodnih kanala;
- i) regulisanje ograničenja i obustave saobraćaja;

- j) regulisanje postavljanja i dopune saobraćajne i turističke signalizacije;
- k) regulisanje postavljanja reklamnih znakova;
- l) vođenje evidencija cesta, cestovnog pojasa, saobraćajne signalizacije i opreme na cestama;
- m) kontrola gradnje ograda uz cestu;
- n) uklanjanje pokvarenih, napuštenih i oštećenih vozila sa ceste ili cestovnog pojasa;
- o) vršenje drugih radnji u svrhu zaštite nerazvrstanih cesta.

Član 13.

- (1) Prekomjerno opterećenje ceste podrazumijeva njenu upotrebu iznad vrijednosti saobraćajnog opterećenja iz člana 7. stav (2) ove odluke kao i učestalo saobraćanje istih vozila sa teretom po istim dionicama ceste, nastalu zbog obavljanja djelatnosti pravnih i fizičkih lica uz cestu ili preusmjeravanja saobraćaja na cestu zbog zatvaranja javne ceste na duže od 10 dana.
- (2) Za prekomjerno korištenje ceste podnosi se Upravitelju zahtjev za izdavanje odobrenja za prekomjernu upotrebu ceste.

Član 14.

- (1) Vozila na cesti moraju ispunjavati određene uslove u smislu dozvoljenih dimenzija, ukupne mase i osovinskog opterećenja.
- (2) Prijevoz vozilima koja prazna ili zajedno sa teretom prelaze dozvoljenu težinu, osovinski pritisak ili dimenzije, odnosno granice dopuštenog opterećenja na cestama smatra se vanrednim prijevozom.
- (3) Uslovi i način na koji se vanredni prijevoz može vršiti utvrđuje se u odobrenju za vanredni prijevoz, koje je obavezan da pribavi prevoznik od Upravitelja.

Član 15.

Radi sprječavanja ugrožavanja stabilnosti ceste i obezbjeđenja uslova za nesmetano odvijanje saobraćaja na cesti, zabranjeno je zauzimanje ceste i izvođenje bilo kakvih radova ili radnji kao što su:

- a) prosipanje, bacanje i ostavljanje bilo kakvih predmeta, materijala i smeća na cestu;
- b) ispuštanje otpadnih i drugih voda na cestu ili putni jarak;
- c) sprečavanje oticanja vode sa ceste, a posebno iz putnog jarka i iz propusta kroz trup ceste i sprečavanje daljeg oticanja ka njihovim recipijentima;
- d) ostavljanje vozila kojim se ometa bezbjedno i nesmetano odvijanje saobraćaja;
- e) iscrtavanje i brisanje horizontalne saobraćajne signalizacije, oštećivanje, premještanje, zaklanjanje, okretanje i otuđivanje vertikalne saobraćajne signalizacije i cestovne opreme;
- f) svako činjenje kojim se oštećuje ili bi se mogla oštetiti cesta, povećati troškovi održavanja ceste ili ugroziti stabilnost ceste ili sigurnost saobraćaja i dr.

Član 16.

Cestovno zemljište odnosno cestovni pojas, može se povjeriti na korištenje pravnim i fizičkim licima uz prethodno pribavljeno odobrenje Upravitelja radi:

- a) obavljanja djelatosti kojima se pružaju usluge vozačima i putnicima;
- b) gradnje komunalnih, vodoprivrednih i drugih objekata i instalacija i postavljanja priključaka na javne ceste (elektronski, telefonski, antenski priključci i sl.)
- c) postavljanja reklamnih tabli, reklamnih panoa i drugih natpisa.

Član 17.

- (1) Na mjestima međusobnog ukrštanja ceste sa javnim putem ili željezničkom prugom u istom nivou, moraju se obezbijediti zone potrebne preglednosti u skladu sa propisima.

- (2) U zonama potrebne preglednosti zabranjeno je: podizati zasade, ograde, drveće, postavljati postrojenja, uređaje i graditi objekte, odnosno vršiti druge radnje koje ometaju preglednost ceste i željezničke pruge.

Član 18.

Vlasnici, odnosno korisnici zemljišta koji graniče s nerazvrstanom cestom dužni su:

- a) održavati živice,
- b) ukloniti drveće ili dijelove krošnje drveća koje otežavaju promet ili onemogućavaju zračenje i sušenje ceste.
- c) ugraditi betonske cijevi odgovarajućeg profila na pristupnim prijelazima preko jaraka u nivou s cestom i iste održavati u funkcionalnom stanju.

Član 19.

- (1) Upravitelj može da zabrani saobraćaj na dijelu ceste za sva ili za pojedine kategorije vozila na cijeloj cesti, njenom dijelu ili putnom objektu, i to:
 - a) ako se cesta nalazi u takvom stanju da se na njoj ne može odvijati saobraćaj ili se ne može odvijati saobraćaj pojedinih vrsta vozila;
 - b) ako bi saobraćaj pojedinih vrsta vozila nanosio štetu cesti, njenom dijelu ili putnom objektu;
 - c) ako se radovi na održavanju ceste ne mogu izvesti bez obustavljanja saobraćaja.
 - d) ako to zahtijevaju drugi razlozi bezbjednosti saobraćaja.
- (2) Opšta zabrana saobraćaja na cesti, njenom dijelu ili putnom objektu može biti samo privremena.
- (3) Zabrana saobraćaja za pojedine kategorije vozila na cesti, njenom dijelu ili putnom objektu može biti privremena ili stalna.
- (4) Izmjena režima saobraćaja mora se pravovremeno objaviti na web stranici Grada i na drugi pogodan način.

VI - ODOBRENJA UPRAVITELJA I NAKNADE

Član 20.

- (1) Upravitelj u okviru vršenja javnih ovlaštenja u upravnom postupku po službenoj dužnosti ili po zahtjevu stranke donosi rješenje kada odlučuje o izdavanju:
 - a) odobrenja za vanredni prijevoz;
 - b) odobrenja za prekomjernu upotrebu ceste;
 - c) odobrenja za izgradnju objekata i instalacija unutar cestovnog pojasa i zaštitnog pojasa ceste;
 - d) odobrenja za izgradnju priključaka, odnosno prilaza;
 - e) odobrenja za izgradnju autobuskih stajališta;
 - f) odobrenja za poprečno postavljanje instalacija;
 - g) odobrenja za postavljanje reklama;
 - h) odobrenja za privremenu izmjenu režima saobraćaja;
 - i) naloga za obustavu vršenja bespravnih radnji i otklanjanja smetnji na cesti i u zaštitnom pojasu.
- (2) Zahtjevi za izdavanje odobrenja i naloga iz stava (1) podnose se Upravitelju na obrascu čija je forma propisana podzakonskim aktima.

Član 21.

- (1) Naknadu za vanredni prijevoz plaća prevoznik, odnosno vlasnik motornog vozila koje obavlja vanredni prevoz i utvrđuje se na osnovu naznačenih graničnih vrijednosti ukupne

mase, dimenzije i osovinskog opterećenja vozila što je propisano Pravilnikom o utvrđivanju uslova za obavljanje vanrednog prijevoza.

Član 22.

- (1) Visina naknade za korištenje cestovnog zemljišta i cestovnog pojasa za obavljanje djelatosti kojima se pružaju usluge vozačima i putnicima (benzinske stanice, hoteli, moteli, ostali ugostiteljski objekti, autoservisi i drugi objekti) obračunava se u m^2 na godišnjem nivou i iznosi 2,00 KM/ m^2 .
- (2) Visina naknade za korištenje cestovnog zemljišta i cestovnog pojasa obračunava se po m^1 na godišnjem nivou i iznosi:
 - a) za građenje komunalnih, vodoprivrednih i drugih objekata (instalacije, cjevovodi i sl) 0,75 KM/ m^1
 - b) za infrastrukturne vodove (telekomunikacijske i elektronske kablove i sl.) 0,75 KM/ m^1 ;
- (3) Za korištenje cestovnog zemljišta za postavljanje reklamnih tabli, reklamnih panoa i drugih natpisa, visina naknade se obračunava se u m^2 na godišnjem nivou i iznosi:
 - a) jednostrana reklama neosvijetljena 10,00 KM/ m^2 ;
 - b) jednostrana reklama osvijetljena 20,00 KM/ m^2 ;
 - c) dvostrana reklama neosvijetljena 15,00 KM/ m^2 ;
 - d) dvostrana reklama osvijetljena 30,00 KM/ m^2 .
- (4) Naknade iz ovog člana obračunavaju se od dana donošenja rješenja do 31.12. tekuće godine, dok se za svaku narednu godinu korištenja cestovnog zemljišta donosi novo rješenje u kojem je obračunski period od 01.01. do 31.12. odnosne godine.
- (5) Naknada za građenje komunalnih, vodoprivrednih i drugih objekata (instalacije, cjevovode i sl.) se za prvu godinu plaća u punom obračunatom iznosu, a za svaku narednu godinu naknada se plaća u vrijednosti od 50% obračunatog iznosa za prvu godinu korištenja.
- (6) Naknade iz ovog člana obračunavaju se za korištenje cestovnog zemljišta i cestovnog pojasa u obuhvatu ostalog građevinskog zemljišta.

VII - FINANSIRANJE NERAZVRSTANIH CESTA

Član 23.

Finansiranje održavanja i zaštite cesta obezbjeđuje se iz sredstava budžeta Grada Zenica, zainteresovanih privrednih društava, odnosno drugih pravnih lica, i drugih sredstava.

VIII – NADZOR

Član 24.

- (1) Nadzor nad primjenom ove odluke vrši Upravitelj.
- (2) Poslove inspekcijuskog nadzora nad primjenom ove odluke i drugih akata donijetih na osnovu ove odluke vrši inspektor za ceste Grada Zenica (u daljem tekstu: inspektor).

Član 25.

Inspektor vršeći inspekcijuski nadzor u skladu sa ovom odlukom, ima sljedeća prava i dužnosti:

- a) pregledati stanje cesta;
- b) pregledati radove na izgradnji, rekonstrukciji, sanaciji, održavanju i zaštiti cesta;
- c) pregledati radove koje se obavljaju na cesti u zaštitnom i cestovnom pojasu cesta;
- d) pregledati tehničku dokumentaciju u vezi sa radovima iz tački b) i c). ovog člana (dozvole, saglasnosti, projekti, standardi);

- e) pregledati planove, programe, ugovore i ostalu dokumentaciju koja se odnosi na održavanje i zaštitu nerazvrstanih cesta;
- f) pregledati provođenje mjera za osiguranje cesta i saobraćaja na njima;
- g) pregledati provođenje propisanih uvjeta za obavljanje zahvata u cestovnom i zaštitnom pojasu cesta;
- h) pregledati obavljanje upravnih i stručno-tehničkih poslova na cestama.

Član 26.

- (1) Inspektor vršeći inspeksijski nadzor, ima pravo:
 - a) pregledati uređaje, materijale, dokumentaciju izvođača na gradnji, rekonstrukciji ili održavanju cesta;
 - b) saslušati stranke i svjedoke primjenom pravila upravnog postupka;
 - c) uzeti uzorke materijala, te obavljati druge poslove koji su u skladu sa namjenom inspeksijskog nadzora;
- (2) Vršeći inspeksijski nadzor, inspektor ima pravo narediti:
 - a) obustavu radova koji se izvode na cestama, u cestovnom ili zaštitnom pojasu, suprotno odredbama Zakona o cestama FBiH, ove odluke, tehničkim propisima, standardima i normativima, te dati rok za otklanjanje nedostataka;
 - b) otklanjanje nedostataka na cestama koji ugrožavaju sigurnost saobraćaja;
 - c) privremenu zabranu odvijanja saobraćaja na cestama, ako utvrdi da se na njima ne može sigurno odvijati saobraćaj, te narediti da se odmah poduzmu mjere za osiguranje saobraćaja;
 - d) obustavu saobraćaja cestom motornim vozilima koja zbog tehničkih svojstava ili načina na koji saobraćaju mogu nanijeti štetu cestama i kada je njihov saobraćaj na cesti u suprotnosti sa zakonom i drugim propisima;
 - e) isključenje motornog vozila iz saobraćaja na cesti kada utvrdi da dimenzije i ukupna masa ili njegovo osovinsko opterećenje prelazi veličine iz člana 14. ove odluke, a prijevoznik nema odgovarajuću dozvolu za vanredni prijevoz;
 - f) privremenu zabranu saobraćaja na cesti ako utvrdi da sa gledišta sigurnosti saobraćaja ne ispunjava tehničke uslove;
 - g) rušenje građevine ili njenih dijelova i drugih objekata na teret investitora, kao i uspostavljanje provobitnog stanja, ako su izgrađene ili se grade na cesti ili cestovnom pojasu bez odobrenja ili saglasnosti ili suprotno uvjetima iz odobrenja, odnosno saglasnosti nadležnog organa;
 - h) uklanjanje reklamnih znakova u cestovnom i zaštitnom pojasu postavljenih bez odobrenja ili suprotno uslovima iz odobrenja nadležnih organa;
 - i) u nužnim slučajevima, kada bi bila ugrožena sigurnost saobraćaja na cesti ili bi mogla nastati šteta na njoj, odrediti privremene mjere kako bi se otklonila opasnost ili spriječila šteta;
 - j) da se u polju preglednosti otklone nedostaci i nepravilnosti prouzrokovane kršenjem propisanih mjera za osiguranje preglednosti ceste;
 - k) poduzimanje i drugih mjera u skladu sa Zakonom o cestama FBiH i drugim propisima donesenim na osnovu ovog Zakona.

Član 27.

- (1) Inspektor je dužan u okviru svoje nadležnosti bez odlaganja preduzima odgovarajuće prekršajne mjere, ako u vršenju nadzora utvrdi da je počinjen prekršaj iz ove odluke.
- (2) Inspektor upravne mjere poduzima donošenjem pisanog rješenja.
- (3) Protiv rješenja inspektora donesenog na osnovu ove odluke, može se izjaviti žalba Drugostepenoj komisiji za rješavanje po žalbi protiv rješenja donesenih u prvostepenom upravnom postupku.
- (4) Žalba ne odlaže izvršenje rješenja.

Član 28.

Pravna i fizička lica kod kojih se vrši inspekcijski nadzor dužna su omogućiti rad inspektorima, pružiti potrebnu pomoć na njegovo traženje u određenom roku dostaviti podatke i dokumentaciju za vršenje inspekcijskog nadzora u smislu Zakona o cestama FBiH i ove odluke.

IX - KAZNENE ODREDBE

Član 29.

- (1) Za prekršaje utvrđene u ovoj odluci kaznit će se počinitelj ako:
 - a) vrši izgradnju i rekonstrukciju ceste bez odobrenja nadležne službe Grada Zenica i sa nepotpunom tehničkom dokumentacijom, odnosno suprotno odredbama člana 7., 8., 9., 10. i 11.;
 - b) ne izmjesti ili ne prilagodi instalacije nastalim promjenama u roku (član 9.);
 - c) ne poštuje zabrane propisane članom 13., 14., 15., 16., 17., 18., i 19. ove odluke;
 - d) ne omogući vršenje inspekcijskog nadzora i ne pruži pomoć pri vršenju inspekcijskog nadzora (član 28.).
- (2) Novčanom kaznom u iznosu od 500,00 KM do 5.000,00 KM kaznit će se pravno lice, a u iznosu od 100,00 KM do 500,00 KM odgovorno lice u pravnom licu za radnje koje imaju obilježja prekršaja iz člana 26. ove odluke.
- (3) Novčanom kaznom u iznosu od 200,00 KM do 2.000,00 KM kaznit će se osoba koja obavlja samostalnu djelatnost ličnim radom (samostalni privrednik, obrtnik) za radnje koje imaju obilježja prekršaja iz člana 26. ove odluke.
- (4) Novčanom kaznom u iznosu od 50,00 KM do 500,00 KM kaznit će se građanin odnosno fizičko lice za radnje koje imaju obilježja prekršaja koji se odnosi na fizička lica iz člana 26. ove odluke.
- (5) Novčanom kaznom u iznosu od 500,00 KM kaznit će se subjekt nadzora koje ne postupi po rješenju nadležnog inspektora.

XI - ZAVRŠNE ODREDBE

Član 30.

Ova odluka stupa na snagu osmog dana od dana objavljivanja u "Službenim novinama Grada Zenica".

OBRAZLOŽENJE

I – PRAVNI OSNOV

Pravni osnov za donošenje ove odluke sadržan je u odredbama člana 13. stav 2. Zakona o principima lokalne samouprave u Federaciji BiH ("Službene novine Federacije Bosne i Hercegovine" broj: 49/06 i 51/09), člana 4. stav (2) Zakona o cestama Federacije Bosne i Hercegovine ("Službene novine Federacije BiH", broj: 12/10, 16/10 i 66/13) i člana 21. Statuta Grada Zenica ("Službene novine Grada Zenica" broj: 05/15).

II - RAZLOZI ZA DONOŠENJE

Razlozi za donošenje ove odluke proizilaze iz potrebe da se propisima Grada Zenica uredi upravljanje, izgradnja i rekonstrukcija, zaštita, korištenje i održavanje nerazvrstanih cesta kao i poslovi nadzora nad tim cestama u skladu sa članom 4. stav (2) Zakona o cestama Federacije Bosne i Hercegovine ("Službene novine FBiH", broj: 12/10, 16/10 i 66/13) kojim su isti dati u nadležnost Grada.

III – PRAVNA RJEŠENJA

Članom 1. propisan je obuhvat ove odluke i to: upravljanje, izgradnja i rekonstrukcija, zaštita, korištenje i održavanje nerazvrstanih cesta kao i poslovi nadzora nad tim cestama na teritoriji grada Zenica.

Članovima 2. 3. i 4. propisana je definicija nerazvrstanih cesta, sticanje prava, mreža nerazvrstanih cesta.

Članovima 5. i 6. propisano je upravljanje nerazvrstanim cestama.

Članovima 7. i 8. , propisan je pojam izgradnje ceste, rekonstrukcije i sanacije ceste.

Članom 9. propisana je obaveza vlasnika instalacija, obaveze investitora i preusmjeravanje saobraćaja sa javne na nerazvrstanu cestu kod vršenja radova koji iziskuju premještanje postojećih instalacija u cestovnom pojasu.

Članom 10. definiše se pojam priključka na cestu.

Članom 11. propisuje se vrsta održavanja, poslovi i obim istih, pojam redovnog i hitnog održavanja.

Član 12. propisuje šta sve obuhvata zaštita ceste.

Član 13. propisuje kada i na koji način može doći do prekomjernog opterećenje ceste.

Član 14. propisuje uslove koje vozila na cesti moraju ispunjavati, te pojam vanrednog prijevoza.

Članom 15. propisuju se zabrane radova i radnji koje mogu dovesti do ugrožavanja stabilnosti ceste i obezbjeđenja uslova za nesmetano odvijanje saobraćaja.

Član 16. propisuje način povjeravanja i uslove pod kojima se može cestovno zemljište i cestovni pojas povjeriti na korištenje pravnim i fizičkim licima.

Član 17. propisuje obavezu održavanja mjesta ukrštanja nerazvrstanih cesta sa javnim putem ili željezničkom prugom u istom nivou radi obezbjeđenja potrebne preglednosti, te navodi zabrane za zone preglednosti.

Članom 18. propisuju se obaveze vlasnika, odnosno korisnika zemljišta koje graniči sa cestama.

Član 19. se odnosi na zabrane koje se mogu uvesti na cijeloj cesti ili njenom dijelu. Određuje dužinu trajanja zabrane, njenu objavu i oznaku odgovarajućom signalizacijom.

Član 20. propisuje pokretanje i vođenje upravnog postupka i donošenja rješenja po službenoj dužnosti ili po zahtjevu stranke, u okviru vršenja javnog ovlaštenja upravitelja.

Član 21. određuje obveznika plaćanja i način obračunavanja naknade za vanredan prijevoz.

Član 22. se propisuje visina i način obračuna i plaćanje naknade za korištenje cestovnog zemljišta i drugog zemljišta koje pripada cesti.

Članom 23. propisani su izvori finansiranja nerazvrstanih cesta.

Član 24. propisuje nadzor nad primjenom odluke.

Član 25., 26. i 27. propisuje prava i dužnosti inspektora za ceste prilikom vršenja inspekcijskog nadzora te nadležnost drugostepene komisije za rješavanje po žalbi protiv rješenja donesenih u prvostepenom upravnom postupku po ovoj odluci.

Član 28. propisuje dužnosti pravnih i fizičkih lica kod vršenja inspekcijskog nadzora.

Član 29. propisuje prekršaje i visinu novčanih kazni srazmjerno počinjenom prekršaju.

Član 30. propisuje vrijeme stupanja na snagu ove odluke.

IV – FINANSIJSKA SREDSTVA

Za provođenje ove odluke nisu potrebna finansijska sredstva iz Budžeta Grada Zenica.

V – DONOŠENJE AKTA

S obzirom da se radi o donošenju nove odluke na nivou Grada shodno Zakonu o cestama FBiH ("Službene novine FBiH", broj: 12/10, 16/10 i 66/13) predlaže se da predmetni akt bude razmatran u formi nacrt.